

四庫全書

史部

欽定四庫全書

史部

景定嚴州續志卷一  
一至三

詳校官監察御史<sub>臣</sub>沈孫璉

檢討<sub>臣</sub>德生覆勘

總校官編修<sub>臣</sub>王燕緒

校對官編修<sub>臣</sub>莊通敏

謄錄監生<sub>臣</sub>殷傑

欽定四庫全書

史部十一

景定嚴州續志

地理類三

都會郡縣之屬

提要

臣等謹案景定嚴州續志十卷宋鄭瑄方仁榮同撰瑄時官嚴州教授仁榮時官嚴州學錄其始末則均未詳也所紀始於淳熙訖於咸淳標題惟曰新定續志不著地名蓋刊附紹興舊志之後而舊志今佚也嚴州於宋為

遂安軍度宗常領節度使即位之後升為建  
德府故卷首載立太子詔及升府省割體裁  
視他志稍殊惟物產之外別增瑞產一門但  
紀景定麥秀四岐一條鄉飲之外別增鄉會  
一門但紀楊王主會一條則皆乖義例耳然  
敘述簡潔猶興記中之有古法者其戶口門  
中載寧宗楊皇后為嚴人而鄉會門中亦載  
主集者為新安郡王永寧郡王新安者楊谷

永寧者楊石皆后兄楊次山之子也而宋史  
乃云后会稽人當必有誤此可訂史傳之訛  
矣乾隆四十六年九月恭校上

總纂官

臣紀昀

臣陸錫熊

臣孫士毅

總校官 臣陸費墀



景定嚴州續志序

郡之有志所以紀山川人物戶口田賦凡土地之所生所宜也嚴於浙右為望郡而介于萬山之窟厥土堅而隔上不受潤下不升鹵雨則潦霽則槁其田則土淺而源枯介乎兩山節節級級如橫梯狀其民苦而耐其俗樸而野其戶富者畝不滿百其賦則以地不產米民僅以山蠶而入帛官兵月廩率取米於鄰郡以給而百姓日糴則取給於衢婺蘇秀之客舟較之於他郡其等為

最下下而巖之所以為望郡而得名者不以田不以賦  
不以戶口而獨以雲山蒼蒼江水泱泱有巖子陵之風  
在也郡志自淳熙後缺而不修者距今七十餘年吳越  
錢君可則以太府丞來守巖政事之暇為之訪蒐以補  
其缺偏削訖而走書屬予序予謂巖為我太宗皇帝高  
宗皇帝建旄之地今皇儲賜履之封則一郡之山川人  
物風俗戶口田賦職方氏皆欲究知之矧惟天子聖明  
勒恤民隱凡州牧之出辭入覲必詳訪焉是編之作非



惟可以備顧問亦可以少助宵旰民瘼之萬一也景定  
壬戌四月朝奉郎主管成都府玉局觀方逢辰序



欽定四庫全書

景定嚴州續志卷一

宋方仁榮鄭瑄同撰

節鎮

嚴州在國初仍唐舊為睦州隸吳越建隆元年太宗皇帝以皇弟領防禦使車書混一州隸兩浙西路政和帝升建德軍節度宣和三年改州為嚴州軍為遂安軍十二月高宗皇帝以皇子領遂安慶源軍節度使詔勅悉

載前志翠華駐蹕錢唐郡為畿輔地望日雄寶祐五年十一月詔以皇子忠王特授鎮南遂安軍節度使景定元年六月御筆立為皇太子而此邦節鎮至是愈增重云

皇子忠王授兩鎮節度使制

門下御家者親親所以隆天性之愛詔爵者貴貴所以植宗國之強式稽舊章茂賁元子作真王而啟宇望已重於承祧易巨鎮以建旄崇莫加於疊組肆涓穀旦誕

舉徽章爰咨在列之良式聽揚廷之命皇子崇慶軍節  
度使開府儀同三司忠王食邑八千戶食實封三千戶  
體凝四氣性備五常言必詩書信矣隆師親友之效動  
循法度見諸鳴玉曳履之間雖岐嶷之夙成亦進修之  
加益每見晨昏之定省能知宵旰之憂勤契於朕心豈非  
天意乃者藏祠重屋禘禮貳觴祖考神祇之顧歆遠近  
內外之歡洽豐水數世將益廣於周仁大國十成詎可  
拘於漢制洪惟端拱之屬賢嗣常領荆湖而建將壇庸

按版圖丕崇令典新定則我太宗之舊建洪都則我壽  
聖之初潛植燾建牙煥陳儀於兩鎮加田陪食仍眎禮  
於三台以承累世之休以共萬年之福於戲立愛立敬  
朕非假名噐之私克儉克勤爾尚贊邦家之治往服明  
訓益綏令猷皇子可特授鎮南遂安節度依前職位加  
食邑一千戶食實封四百戶主者施行

節度使榜

遂安軍節度使應遂安軍管內官吏軍人僧道百姓等

茲者仰荷乾尊誕申異命漢真王之璽綬仍履舊封唐  
兼鎮之節旄特昭異數睠嚴陵於左輔實高廟之初潛  
祇榮已凜於涉冰延見懼違於問曉洪惟上聖動契天  
心謂社稷太平之階積於強本而父母生民之澤寓在  
立親家之安者下之寧近之篤者遠之舉凡爾搢紳多  
士介胄連營不體皇恩叶肩職分粵若緇黃之侶暨夫  
斑白之氓宜以慈善廣教風宜以孝悌形媿俗諸有尊  
屬並存問之

金史卷一百一十一  
卷一  
右榜遂安軍仍散下管內各令知悉

寶祐五年月日皇子鎮南遂安軍節度使開府儀同

三司忠王押

御筆立忠王為皇太子

朕祇承統業於今三十有七年夙夜不敢康懼弗克昭  
受上帝命惟曩一親郊嗣是明禋凡十有一嚴恭將事  
時靡怠遑獨主鬯猶虛孰相大禮恐無以答幽顯之望  
皇子忠王仁孝恭順有聞於時涵養踐脩尤敏於學是



用蔽自朕志庸正儲闡將以一忱對越在上庶幾祖宗  
顧歆神人闡澤哀時多祉於以降萬世不拔之基可立  
為皇太子仍改名其官屬儀物制度令有司討論典禮  
以聞

立皇太子詔

門下三代治安至千歲所以明有道之長一人元良正  
萬邦所以行無疆之慶惟君臣父子之並處實天地祖  
宗之顧歆朕以眇躬嗣臨大統閱歷春秋之滋久祇勤

夙夜以靡渝事會孔殷敢諉興王而啟聖鑒觀於赫終  
幸福降而禍消方將嚴禋祀以報稱戒臣工而妥佑爰  
念承祧之至重詎容主鬯之尚虛蔽自朕衷孚於羣聽  
皇子鎮南遂安軍節度使開府儀同三司忠王食邑九  
千戶食實封三千四百戶孝敬而雍穆濬哲而溫文學  
寓虎闈獨得息養瞬存之力禮行鶴駕具知宵衣旰食  
之勞娛心一本於詩書律已悉安於禮義朕惟藝祖開  
基之運若循環之方來高皇與子之心每契合而無間

肆予元祀申錫嘉名渙宸號於大昕之朝位隆貳極炳  
陽精於積燎之後瑞應重光穹昊之眷可占黎元之望  
允愜剛辰穆卜緝典肇修於以聳前星少海之令儀於  
以對世室明堂之景貺於戲賢聖聞於天下既克當貽  
燕之謀謨烈啟我後人尚益懋延洪之業祇若朕命惟  
懷永圖可立為皇太子改名某仍令所司擇日備禮冊  
命主者施行

冊

維景定元年歲在庚申七月丁卯朔十七日癸未皇帝  
若曰太子天下之本也乾象呈祥前星有耀震宮主鬯  
神器是司於以答景貺於三辰於以衍慶源於百世元  
良正則萬邦正此三代所以為有道之長也朕惟我朝  
聖聖相傳世世並受宏規懿範用敷遺後人休肆予涼  
德祇承大統三十有七年矣庸舉園丘之禮屢修重屋  
之禋今茲孟秋又將講上儀陳美報羣公庶尹先後駿  
奔克相稔容曰惟元嗣爰敷大號庸建儲宮咨爾皇子

鎮南遂安軍節度使開府儀同三司忠王食邑九千戶  
食實封三千四百睿性淵澄英標玉粹荷烈祖萬年之  
澤為重華四世之孫自開朱邸以承休日侍皇闈而毓  
德問寢視膳謹三朝也尊師就傅游六藝也冠冕服黻  
威儀踰濟動有則也苴茅授鉞滿假不形行有常也暨  
渙汗甫頒離明洞照羣陰退斂萬宇肅清允叶天人之  
望也行當秉植圭嚴亞裸庶幾宗廟顧歆百神享之矣  
是用穆卜剛辰端御路朝冊命爾為皇太子改名某於

戲惟仁可以厚基本惟明可以辨邪佞惟謙可以去驕  
吝惟儉可以抑華靡繼自今親正人聞正言行正道勉  
之勉之以保我祖宗無疆之景祚

陞建德府省劄

都司還房門下中書後省狀照對兩省準尚書省劄子  
勘會溫嚴宜忠州係今上皇帝潛藩之地合陞府額須  
議指揮三省同奉聖旨令中書門下省日下擬定申尚  
書省等今開具下項一溫州本州有永嘉縣係前代年

號今欲用紹興隆興慶元寶慶典故以初元為府號欲  
擬陞咸淳府一嚴州本州有建德縣今欲擬陞建德府  
一宜州本州係慶遠軍節度今欲擬陞慶遠府一忠州  
本州有龍渠縣今欲擬陞興龍府伏候指揮施行申聞  
事照得後省所申溫嚴宜忠四州係今上皇帝潛藩之  
地合陞府額內嚴州擬陞為建德府宜州擬陞為慶遠  
府嘉名已稱第溫州元擬為咸淳府近郡稱謂稍生  
忠州元擬陞興龍府所稱尤覺未妥今欲將溫州改

陞為瑞安府忠州恰作為咸淳府八月六日奉聖旨  
依

右劄付建德府

咸淳元年月日押

陞建德府制可

勅門下朕嗣宅丕后誕保受民皇天全付有家敢怠繼  
承之敬乾元首出庶物聿懷潛躍之初念聖考之詒謀  
擇价藩而賜履嚴陵龍水之鎮授節齋壇永嘉忠南之



封分茅王社睠言屏翰之重允協謳歌之歸漢輿地之  
上圖若稽先典周舊邦之新命並錫府名以永萬年之  
觀亦尚一人之慶其温州改陞瑞安府嚴州改陞建德  
府宜州改陞慶遠府忠州改陞咸淳府故茲詔示想宜  
知悉

咸淳元年八月二十八日太傅右丞相魏國公  
臣似道參知政事臣萬里同知樞密院事兼權  
參知政事臣爚兼給事中臣夢炎等謹言詔書

如請

右奉詔付外施行

咸淳元年八月二十九日午時制可

城闕

州城宣和中知州周格重築歲久頽圯弗治至為樊墻  
以限踰越嘉定癸酉知州宋鈞復興板築越一暮有半  
乃訖工築凡東西八百二十有二丈南北三百四十有  
四丈葺補者不與焉今瀕江一帶雉堞如制累經巨浸

莫能壞餘雖土垣猶乃堅好城門八洎以名去別儲帑成之今悉經改作矣

朝京門

前志為聖雲門

今門樓與和平門樓皆今侯錢可則

重建

定川門今門樓知州王必重建

安泰門安流門今門樓知州趙孟傳重建

善利門嘉貺門今門樓知州李介叔重建

子城周四三里正南為遂安軍門門有樓甚偉淳祐

壬子圮于水明年知州季鏞築基鳩材念民疲不敢  
亟又明年替去知州吳槃成之樓成不減舊觀參政  
徐清叟為之記

譙樓因州門為之門之外左為宣詔亭右為頌春亭  
壬子水郡以厭勝之說取州碑漂之明年知州季鏞  
搜舊篆更置樓亦浸敞開慶己未知州謝奕中重修  
校官鄭瑤為之記

戶口

前志載紹興己未戶七萬二千二百五十六丁一十一萬一千三百九十四淳熙丙午戶八萬八千八百六十七丁一十七萬五千九百有三蓋昔者丁錢未蠲民苦重賦故生子有不舉自乾道五年張宣公知州抗疏祈免旨減放有差至淳熙丁口之數比紹興增凡六萬四千五百有九開禧元年十二月御筆盡免兩浙身丁錢從中殿之請也蓋恭聖仁烈皇太后為嚴人故有是請今為戶凡一十一萬九千二百六十七口凡三十二萬

九千二百有六比淳熙之數益增豈非先太后深仁厚澤所致哉故大書之以著邦人之追慕云耳

郡治

郡治在子城正北宣和中知州周格重建僅足公宇而已燕游之地往往蕪廢故前志所載自千峯榭高風堂瀟灑樓之外餘皆名存實無充拓迨今甫稱諸侯之居設廳之北為坐嘯又北為黃堂

舊名  
觀香

又北為正堂曰

秀岐

舊名省心今侯錢可則以  
近郊獻雙穗麥因更此名

瀟灑樓在正堂北

舊名紫翠

其下為思范堂堂之北為月

臺

燕堂在治事廳之北又北為綠陰東為東齋高風堂  
在治事廳之東又東北為植賢亭為松月亭堂北有  
栢石刻壽栢二字識其古也

千峯榭在高風堂之北憑子城為之其東為環翠亭  
松關在千峯榭之下由松關而北為荷池池之東為

潺湲閣西為木蘭舟

舊名荷淨

讀書堂自為一區在木蘭舟之西舊為北園淳祐已酉知州趙孟傳改建

擬蘭亭在潺湲閣之東掬泉為流觴曲水

舊名流羽

其東

北為釀泉

錦窠亭在釀泉之南

舊名采岐

知州吳槃改今名桂館在瀟

灑園池之西杏園桃李庄又在其西面山閣自為一

區在錦窠亭之東其下為賦梅堂

舊名黃堂

知州季鏞易

今名而以黃堂扁於設廳北於義為稱



瀟灑園池郡圃之總會也

舊名後樂

射圃在瀟灑園池之南為堂曰正巳

東溪在射圃之南亭曰銀潢左界

舊名飛練

又南為翔蛟

列解

通判廳在軍門內西

風月堂在公廳後景定庚申通判曹元發始以舊扁題之

南薰堂在公廳右嘉定癸酉通判謝采伯建錦綉堂

在南薰堂右淳祐辛亥通判吳溥建園曰西園為亭

三曰第一開

舊名梅亭

曰愛蓮曰仰高舊有茅亭湛碧蔬

畦三亭今廢

添差通判廳在東山下淳熙丙午知州陳公亮始以公館為之

平分風月堂在公廳後

光風霽月樓在公廳左通判潘墀建

秀亭枕東山為之足遠眺望寶祐癸丑通判楊敬之

重建越三年乙卯通判吳堅以舊扁題之餘廳如前  
志

倉場庫務

平糴倉附於常平倉寶祐戊午知州李介叔置先是知  
州宋鈞捐帑買田為催科義庄以便役者後乃淪沒至  
是始根括還官歲收其入以備凶荒焉郡人黃蛻為之  
記

合同場在輯睦坊通判楊敬之重建

軍資庫舊在儀門外東今移街西即回易庫廢址

抵質庫在軍門內東淳祐辛亥知州趙汝歷以舊醋庫

改充

神泉鑄錢監在朝京外今廢

安養院淳祐壬子知州趙汝歷即神泉監廢址為之餘

如前志

館驛

前志有新定驛有公館如歸館定川館東館西館今悉

非其舊庸志其改作者焉

行衙二

一在儀門外東開慶己未知州謝奕中以新定驛  
改建即軍資庫舊址

一在都稅務西即多慶園舊址淳祐丙午知州  
章大醇改建

盍簪亭

舊名東館

淳祐壬子毀於水明年知州季鏞重建

安流亭在朝京門外江許

溪山偉觀在城上朝京門之南與南山瀟灑亭相望  
羣山獻奇二江成字甍棟鱗層椀櫓下上一舉目而  
盡得之真偉觀也景定辛酉今侯錢可則建

泳澤亭在湖堤上與湖心寺相望旁為二亭翼之曰  
淨碧曰汎清今侯錢可則建

坊市

前志在城十有九坊今二十有五蓋續建者六易舊名  
者六用析書之

宣化坊

在薰樓外西

桂華坊

在梓潼殿西

狀元坊

在軍門外淳祐庚戌知州趙汝厯以方逢辰為大對第一故表之

清靜坊

在天慶觀東

遷善坊

在兜率寺前

安樂坊

在純孝坊內

右續增

英達坊

舊名育英

純孝坊

以上一字犯  
御舊名改

里仁坊

舊名  
仁里

留愛坊

舊名  
遺愛

物阜坊

舊名  
阜俗

朝京坊

舊名  
望雲

右續改

橋梁

定川門外跨新安江為浮梁凡百二十艘舊名政平前



志名永通寶祐丁巳知州李介叔重建至景定庚申甫四年往往腐脫往來者病焉今侯錢可則一新之名之曰濟川為亭於橋之北曰要津

石橋在城內者十有三在近郊者五前志或載或否今悉書之

一在軍門前曰卧龍橋

一在市心五聖樓下曰龍津橋

舊名伏龍

一在子城東門外

一在嘉貺門內西

一在雙桂坊北

一在百順門內東

一在建德縣治前

一在縣前直南

一在縣東曰章家橋

一在縣東南曰舍人橋

一在建安坊曰馬賀橋

舊傳以馬賀二  
家共建得名

一在安泰門內

一在後瀝舊放生池側

一在朝京門外曰余浦橋景定辛酉圮於水郡貢士

王炎捐貲重築

一在和平門外

一在陪郭塢口曰獅子橋

一在陪郭塢曰風矸橋有亭八楹景定辛酉圮於水

一在嶽廟東一里許曰杜橋

景定嚴州續志卷一

欽定四庫全書

景定嚴州續志卷二

宋方仁榮鄭瑤同撰

郡官建置

州屬禹貢揚州之境秦郡縣天下隸郡太守漢建武十三年置新都郡新都太守即今徽嚴兩州之境是已晉太康中改為新安郡宋齊梁陳咸因之其分封有新安王其治郡有新安太守隋仁壽三年始以新安遂安桐

廬三縣置睦州領以刺史即今州境是已後改睦州為  
遂安郡置郡太守而以歙州為新安郡唐武德中復為  
睦州天寶元年改睦州為新定郡後雖沿革不一然皆  
以刺史領州五代時隸吳越國初以防禦使遙領吳越  
納土後命殿中丞李繼敏權知睦州自是為知軍州事  
政和中升為節度州宣和三年改嚴州寶祐三年三月  
始命守臣兼節制軍馬乾德中置通判軍州事其後有  
添差通判省置不常今為定負其學官有州學教授間

有添差教授然不常置有釣臺書院山長以州學教授

兼領其郡僚有節度掌書記

與觀察支使通差

節度推官錄事

參軍司理參軍司力參軍司法參軍其兵官有路分都

監一員州都監兩員監押一員間有路鈐轄州鈐轄不

常置近又有添差路鈐路分員冗滋甚送迎廩稍郡計

患之今侯錢可則奏省兵鈐以下添差官自從之其監

當官有都酒務比較務贍軍務在城都稅務東津稅務

今三酒務合為一官亦省員舊有神泉監監廢官亦隨

省諸縣官疏于各縣之下

知州題名

前志題名僅紀歲月而政績例不書今自寶慶改元以來序其次撫其有政績者附書之使後之觀者有考焉

謝采伯

朝議大夫寶慶元年十月初八日到任寶慶二年二月初六日宮觀先是為通判州事是

正守陵祠位在任有惠政

陸子適

奉議郎寶慶二年十一月十五日到任紹定二年三月二十二日赴召祖佃父游皆出守

列于州學之世美祠始於鈞臺書院



陳畏

朝奉大夫  
紹定二年三月二十二日  
到任  
紹定三年六月二十五日去任

衛樸

朝奉郎  
在任  
轉朝散郎  
紹定三年六月十六日  
到任  
四年九月十三日  
除太府寺丞  
備禦衛寇

有功在任  
有惠政

李彌高

朝奉大夫  
在任  
轉朝散大夫  
紹定五年六月十七日  
到任  
六年四月十七日去任

趙汝棹

朝散郎  
紹興六年四月十七日  
到任  
當  
年七月十七日  
除直寶章閣  
兩浙運判

顏頤仲

朝奉郎  
在任  
轉朝散郎  
紹定六年八月二十  
四日  
到任  
瑞平元年九月十三日  
除司農寺

丞在任  
有惠政  
奏用全會入納

葛逢

朝散大夫  
瑞平元年十一月十三日  
到任  
二年四月十五日  
除秘書省著作郎

王會龍

承議郎端平二年七月初五日到任三年四月二十七日除秘書省著作郎

趙汝柄

奉議郎端平三年五月二十日到任嘉熙元年六月初一日去任前守汝捍弟

萬一薦

朝散大夫嘉熙元年十二月十三日到任三年四月內去任

衛湜

朝散郎直秘閣在任轉朝請郎又轉朝奉大夫嘉熙三年七月初六日到任四年十二月二十

六日赴召前守樸之叔刊禮記集說一部

趙與汶

朝請郎直秘閣嘉熙四年十二月二十六日到任淳祐元年二月二十一日別與州郡

王似

朝奉郎在郎轉朝散郎淳祐元年三月十四日到任二年九月二十六日去任救荒有大功修

州學行鄉飲修釣臺書院始教養嚴氏子孫

何處信

朝議大夫淳祐二年十二月初六日到任三年七月初三日去任

趙希樸

朝議大夫淳祐三年八月初三日到任四年七月二十一日除軍器少監五年正月除金

部郎官前守師古子父子皆  
有惠政列于學之世美祠

章大醇

朝奉郎在任轉朝散郎淳祐五年二月初九日到任六年十月初四日除侍左郎官在任

有惠政

高斯得

朝奉郎在任轉朝散郎淳祐七年三月初四日到任八年六月除浙東提刑當年七月十

九日去任在  
任有惠政

趙孟傳

宣教郎直寶謨閣在任轉直郎又轉奉議郎淳祐八年七月二十九日到任十年二月

除刑部郎官增廩十一月給  
增貢院夾廊奏增貢額未允

趙汝歷

奉議郎在任轉承議郎淳祐十年六月初三日  
到任十二年四月除司農丞增版釣臺書

院

李鏞

承議郎淳祐十二年八月初一日到任寶祐二  
年八月十三日替極溺有大功修學舍菜齒飲

郡政綱  
目悉舉

吳槃

朝奉郎寶祐二年八月十三日到任三年三月  
劉兼節制軍馬寶祐四年正月二十七日去任

造貢院試桌重建軍門造  
魁星樓奏增貢額未允

李介叔

朝奉郎在任轉朝散郎寶祐四年四月初三日  
到任六年六月初五日滿替置平糶倉代

民輸  
稅逋

謝奕中

朝散郎在任轉朝請郎寶祐六年六月初六日到任景定元年五月十一日除都官郎官

當年六月十八日替前守來伯姪重修譙樓修明經界舊籍來請城隍廟額改創儀門外行衙修夫

子殿重造戟門  
造兩廊從記簾

錢可則

承議郎以直寶章閣於景定元年六月十八日到任二年十二月准省劄陞直文華閣權

任三年四月八日陞直敷文閣知嘉興府五月一日除尚左郎官十一日陞直徽猷閣除浙東提舉

六月初  
八日替

郭自中

奉議郎景定三年六月初八日到任四年三月初二日准省劄令赴都堂稟議於當年四

月十五  
日去任

全槐卿

朝散郎以右文殿修撰於景定四年四月十  
五日到任五年三月六日準省劄改知徽州

於當年四月二  
十六日去任

趙益蟻

承奉郎在任轉承事郎又轉宣義郎景定五  
年四月二十六日到任咸淳元年八月七日

除直秘閣江淮都官於  
當年十二月六日替

史胄之

朝請大夫在任轉朝議大夫咸淳元年十  
二月初六日到任二年二月十日去任

楊潮南

朝散郎咸淳二年七月十九日到任三年五  
月九日準省劄令赴都堂稟議當月十日去

任

趙與植

承議郎在任轉朝奉郎咸淳三年五月初六日到任五年正月十三日除浙西提舉於當

年二月二十

七日去任

呂植之

宣教郎在任轉奉議郎又轉承議郎咸淳五年三月二十一日到任於六年四月初九日

除兵部郎官兼說書於

當年七月七日去任

李萊老

朝請郎咸淳六年六月十六日到任當年八月六日丁木生母憂去任

### 通判題名

姜彌明

奉議郎端平三年十二月八日到任嘉熙二年正月二十六日改添差通判臨安府

魯之損

朝請大夫嘉熙二年十月十一日到任嘉熙四年十二月初六日滿

武迪

到任 中奉大夫嘉熙四年十二月七日  
到任 淳祐三年二月二十七日滿

徐士特

到任 朝奉郎淳祐三年十二月二十八日  
到任 淳祐五年二月十二日去任

張澄

到任 朝奉郎淳祐五年三月初八日  
到任 七年六月初二日滿替

史望之

到任 朝散郎淳祐七年六月初三日到任  
八年十一月初七日除宗正寺簿

謝焱

到任 朝散郎淳祐八年十二月二十七日到任  
任 十一年正月初二日差知岳州離任

吳溥

到任 奉議郎淳祐十二年正月初三日  
到任 于當年六月初七去任

孫一飛

到任 朝散郎淳祐十二年七月二十五日  
到任 于當年十一月十七日去任

宣毅

到任 朝奉郎寶祐元年六月十三日  
到任 于當年十月十八日去任



陳崇

朝請郎寶祐二年三月初九日到任四年三月二十二日滿

朱逢

朝奉郎寶祐四年三月二十三日到任于當年五月十八日去任

史松卿

奉議郎寶祐二年八月十七日到任問慶元年八月二十八日替

曹元發

宣教郎問慶元年八月二十八日到任景定元年除國子博士

康務本

朝議大夫景定元年十一月二十一日到任

添差通判題名

郭磊卿

奉議郎端平三年十月到任在任轉承議郎又轉朝奉郎嘉熙二年九月除太博

陳叔達

宣義郎嘉熙三年十一月十九日到任在任轉宣教郎四年六月十七日去任

韋鑑

承議郎嘉熙四年八月二十日到任淳祐六年正月二日去任

孫夢觀

奉議郎淳祐元年十二月十三日到任二年四月十九日予祠

趙與澣

宣教郎淳祐二年六月三日到任在任轉奉議郎三年六月廿六日子祠

趙時掌

朝請郎淳祐三年九月十九日到任五年四月除太府寺簿

留張遇

奉議郎淳祐五年四月二十二日到任淳祐七年六月十一日滿

吳湜

承議郎直祕閣淳祐七年六月十二日到任在任轉朝奉郎九年六月十六日滿

謝奕正

直郎淳祐九年六月十七日到任在任轉奉議郎十一年七月二十二日滿

潘輝

宣教郎淳祐十一年七月二十二日到任在任轉奉議郎寶祐元年七月二十二日滿

楊敬之

道直郎寶祐元年七月二十四日  
到任二年十二月六日別與差遣

吳堅

宣教郎寶祐三年四月十一日轉奉  
議郎五年四月二十六日滿除大博

郭和中

承奉郎徽州通判兩易寶祐五年四月  
二十七日到任開慶元年十一月丐祠

林子烈

朝奉郎開慶元年十一月二十日到任轉  
朝散郎景定三年十一月二十四日滿替

樓晏

承議郎景定三年十  
一月二十五日到任

賢收

嚴為瀟灑郡典領山川者非清高不與焉前志所紀田  
諫議范文正趙清獻真能稱其山川者也南渡以來有

金史紀事本末卷之二  
光於三君子者相望宜嗣書之其方翱翔天衢未究遠業者姑俟後之秉筆者焉

潘良貴字子賤號養空婺之金華人名望巋然純德君子也紹興二年以直龍圖閣知州雖在郡之日甚淺而郡人尊之至于今不忘其為政可知也今有祠在學宮列于名侯

胡寅字明志號致堂建寧人文定公子紹興六年以徽猷閣待制知州政教並行民用胥勸明年文定公

自衡山抵書曰汝在桐江一年矣大凡從官作郡一年未遷卽有怠意汝宜作三年計日勤一日思遠大之業未幾移知永州今學宮公所改作也有祠列于名侯

張栻字敬夫號南軒謚曰宣廣漢人魏公子以理學為朱文公呂成公友乾道五年以直祕閣知州其治不嚴而威不疾而速大抵以教化為先務奏蠲丁鹽錢絹民以蕃庶旅名山斥淫祠至今遺老猶能誦張

直閣馮令學門公所創也與呂成公並祠于廟景定  
辛酉旨封華陽伯秩于從祀令侯錢可則做帝學繪  
祀因舍萊馮

名宦

紀名宦次以歲月不以官

呂祖謙字伯恭學者尊之曰東萊先生謚曰成嫠之  
金華人乾道五年需大學博士次來為郡員外博士  
鐸音大振士由遠方負笈者日衆泮宮至不足以容

之在學著春秋講義明年張南軒為守政教胥善南  
軒奏免丁錢狀先生所作也與南軒並祠于學寶慶  
丙戌其子延年宰建德邦人見之如見先生越月以  
戎簿召景定辛酉追封先生為開封伯秩于從祀今  
侯錢可則倣帝學繪祀因舍菜馬時其孫寶之仍以  
建德宰行獻事

徐僑字崇父號毅齋婺之義烏人從東萊晦庵二先  
生游開禧和戎公適以謁選留京陳所以折敵之策

雖言不果用而朝論韙之留為京學教授公竟從選部授觀察推官來嚴在郡多所裨贊事有不可必反復論諍不為矯激意雖異已者久益知敬郡守欲舉公適同僚有謀合穎去者公遜先之再舉卒不受朝紳以學洞聖原行表鄉曲薦之遂以掌故登朝後仕至工部侍郎與參政真西山俱繫時望云

郭磊卿字子奇號允齋天台人端平三年由太社令來為添差通判延納儒生誨以義理之學一千以私



輒叱去郡政不逮多所正救部使者以訟牒屬公曰  
旁午公從容剖決大抵以厚風俗燬教化為本舞文  
弄法之徒姦莫能遁邦人士翕然尊之後召為太博  
及居言路皆稱其官世以不及大用為惜子和中寶  
祐五年以兩易來繼父官其精明實似之

### 瑞產

物有素產亦有瑞產前志所紀素產備矣今續志登成  
瑞產適應庸大書之

景定壬戌夏四月九日郡民孔文桂等言麥秀兩歧  
在東郊公田中知州錢可則遣視良實就採之得歧  
穗餘一百繪圖狀實以獻天子有旨宣付國史館會  
皇弟太師嗣榮王亦以所得函活為圖以進玉音報  
曰祥非偶至應必有先繇輝聯華萼以陶和致秀啟  
麥歧而薦瑞兆王師之不用慶農扈之告登上協天  
心美鍾地產繪圖來進嘉意良勤報聞邦人鼓舞歡  
悅願托琬琰以詔將來太守不能遁也為刻石寘郡

治之高風堂

荒政

郡墾山為田十一二民食仰糴旁郡航粟一不繼便同  
凶年况旱潦乎庚子之旱壬子之水辛酉之絕糴非天  
假仁侯竭力拯惠民其枯魚矣用撫其實以告來者

善政

在題  
名下

嘉熙四年夏秋大旱明年春民橡蕨救死不給路殍  
相枕藉郡無以救於是將作監丞王公佖被選求甦

公下車首局厨傳節浮費一意救荒乞米于朝勸分于鄉靡不力民賴以活去郡時民遮道以酒餞公公為舉一杯醕之公字元敬金華人

淳祐十二年夏六月辛酉大水被九州闐闐為壑五日乃縮壞公私廬舍亡數民苦溺且饑天子遣使歷九州存撫命奏院季公鏞出守拯是邦公下車虛已問俗首蠲秋苗十六力控廟朝寬京府權糴之令發廩分賑民飽實惠捐抽解場本予被水者戶有差不

幾時頓復舊觀民亦忘其為昏墊也秩滿民借留不許遺愛藹然公字伯韶古括人

景定二年秋七月戊寅浙右大水湖秀為甚至于冬十月不退巖雖水駛不久溺然航粟遂梗民無所得糴趨利者冒衝婺禁肩負斗解至價日翔踴時東巖錢公可則司牧是邦喟然曰民可一日無食乎亟發

廩賑之鏤榜諭俗以儲粟運糴為勸

本州環山為郡地非沃衍家乏

蓋歲一年耕且不足以給一年之食此公私所以俱匱也今歲水潦之後浙右諸郡莫不告歉先具無備

摺運方艱不早救圖其將安仰太守日夜念此至切  
如折絹糴米期革舊敝申請省部力抗鄰邦為軍食  
計固毋或不盡其心乃若民食之天日不容闕兢兢  
軫慮由已飢之本州它無公儲止有義倉米斛亦既  
中臺府行賑給惟有遁放摺運招誘客商近已控籲  
于朝屢戒屬邑矣然來者有限食者無涯深山窮谷  
之氓老弱疲癯之輩莫能速致寧免替嗚非富室大  
家隨地應糴安得人人而濟之屨之所謂富室大家  
積倉高廩狼戾腐紅視他處固不多見苟存心於愛  
物於人必有所濟要自有佩服格言力行好事者敢  
以二事勸曰儲積曰運糴是也夫一鄉一里之內豈  
無十數大家伏臘輸官之餘豈無害困寬剩或三二  
百石或七五十石下而至於一二十石家計之不足  
鄉計之有餘鄉計之不足邑計之有餘謹其閉藏時  
其發糶皆足以濟人也官司方幸饑者有告糴之地  
必不強以賑濟必不加以科率必不指無為有證必

為多使之有官吏搔擾之費如此何憚而不儲積土  
狹人稠之境固無穀粟寬餘產嗇財豐之家要必事  
力控實或取之客販或取之鄰境或取之產米之鄉  
移其他經營之資為此時憊遷之舉雖所以利人亦  
所以利己定時而斂及時而發是獨不可為歟官司  
何幸富者有好義之心必不裁其價直必不限其數  
目必不驅東就西強此從彼使之有州縣奔走之撓  
如此又何憚而不運糴又况官民有相因之勢貧富  
有相依之情貨財穀粟有相通之理凡所以為委曲  
者不過欲轉貴糴而為平糴回飢歲而為豐年一邑  
一鄉俱得一飽隱然有安富恤貧之道皆因所利而  
利之耳有人心者安肯坐視雖然官司亦不以虛談  
而致實利有能爭先倡率悉心奉行灼然惠及於民  
自當第其輕重隨其多寡厚加旌賞以示表厲如士  
庶之借補蠲後寓官之減價升秩申之臺閭請之朝  
廷有勞必酬的非文具若夫閉糴增價泄糴出境有

司之法昭昭大守亦不得而私也

力控廟朝弛旁郡糴禁捐帑分糴

列四局平糴市價隨減又稅家運糴應勸分全民以  
全活棠陰蔽芾環台有日邦人有借恂之願焉公字  
正己五王之胄相國之孫今為天台人

稅賦

郡處萬山中土瘠民窳貧均賦任役不可一日無仁  
政紹興界多歷年所圖籍淪散豪民猾吏相為姦欺貧  
民下戶俯首受困至舉其所謂仁政者而彷彿之反曰



不仁人情之難齊久矣不均不平不澄不清寶祐乙卯  
行手實不及竟戊午知州謝奕中奏請修明經界之舊  
有旨諭之于朝屬縣奉行有虔有不虔故民瘼有甦有  
不甦仁政之行果難矣哉諸縣稅額悉前志之舊今不  
復書姑撫建德縣修明之畧于左方它縣雖以成籍來  
上然未足以傳信不敢書

建德縣民產

官產之不均  
稅者在外

坊郭基地以丈計得三萬三千八百六十四田以畝

計得十三萬一千六百三十五山若桑牧之地以畝

計得五十四萬五千二百九十七

石巖雲霧地之不均稅者在

物力

坊郭基地以三等均數計物力三萬一千一百七十

二貫有奇

田山桑牧之地為等不一計物力七十七萬四百四

十八貫有奇

總計八十萬一千六百二十貫有奇

民戶入納有產稅有和預買悉輸絹蓋產稅之外別  
數和預買名色穀黍起數碎煩小民至不能曉又於  
內各有分數俾之以錢代絹謂之折帛錢是致小民  
重為吏攬所愚每年起數之數吏得以高下其手今  
合產稅和買之絹為一每物力四十一貫二百均數  
絹一疋即一貫三十文數一尺坦然明甚合而計之  
正足元額一萬九千一十疋之數外折帛錢徑以物  
力一百貫數納三貫其物力十五貫以下人戶免數

合而計之用足元額一萬九千九百八十貫之數也

如茶錢後錢稅綿上供絲之類大率倣此官無虧賦

民無重征真百幸事也籍成邑宰潛說友為序

紹興  
經界

距淳熙末圖籍已多散失且嘗詔漕臣督州縣補葺  
之則白淳熙至今日其弊又可知已豪右詭名規避  
姦胥舞文變易賦額銷蝕豈惟嚴陵哉寶祐戊午版  
曹始用舊額徵諸郡太守告院謝公諱于衆曰有土  
此有財固也泛以舊額責之縣則產去稅存者其奚  
堪母已則按經界之舊而修明之乎亟聞于上玉音  
俞之說友學製附庸奉行唯謹遂詢僉謀審鄉望嚴  
選任曾不期月而九鄉二十一都各以其籍來上迺  
視鄉分廣狹計物力多寡裁其溢而覈其虧因其輕  
而革其重不底於均不止於是舊額無損新征頓輕

義役成規藉以息民詞科買均配藉以應上命宿奸  
老蠹既為之風瀟雪滌而數十年之苦於白輸者脫  
然如沉痾去體聖君賢太守之賜不其大哉既成父  
老請以等則餽諸梓俾勿壞用略叙其梗槩朱文  
公曰三十年一番經界方好至哉言乎潤澤而推廣  
之尚有望於來者開慶己未良月既望宣教郎特差  
知嚴州建德縣主管勸農  
公事兼軍正潛說友序

## 軍餉

郡以絹三萬六千疋代婺輸上供易婺米一萬五千碩  
以供郡餉此皇祐指揮所以便兩郡也今代婺之緡戶  
部直重於嚴而婺米每每負償雖朝旨督之輒不報嚴

以之困前守屢申廟朝欲令巖自糴米婺自輸絹未俞

也景定庚申令俟錢可則力控得請

景定元年八月空日都省劄子指揮

節文照得嚴州每歲為婺州代納上供絹三萬六千疋婺州却撥米一萬五千石準還嚴州應副支遣自皇祐間有此指揮其來已久嚴州之絹起解版曹不至有欠惟婺州之米多是占吞遂至拖壓蓋以嚴為鄰郡莫可誰何未免忽視今據嚴州申積欠米計二萬八千三百餘石今年合撥之米又不在此數嚴州雖屢常申述朝廷亦屢行推督婺州官吏視為故常更不遵奉今若不與區處變通則婺以抵推為得計而嚴之瀆撓卒未已合議指揮聖旨令嚴州於歲額代婺絹內截留一半一萬八千疋自市米充軍食仍以一半絹解赴戶部婺州亦令解絹一萬八千疋補足戶部元額却與免撥米還嚴州並自景定元年分為始仍下戶部照應施行其婺

州所欠米數照元行  
下運司嚴推撥還

審如朝旨猶是嚴代婺輸絹一萬

八千疋而婺乃盡免餉嚴婺兩郡得失較然明甚而婺

猶拒命不聽明年戶部以兩郡申請不以白于朝復如

皇祐指揮但俾婺米先入于嚴然後趣嚴絹入郡

景定元年

十月空日省劄戶部申照得嚴州代婺州解絹以充上  
供婺州撥米還嚴州充軍糧其來非一日矣邇年兩郡

互有申請施詳案牘其曲不在嚴而在婺蓋嚴代婺解  
絹迺承戶部拘催不可稽違婺還嚴之米既無統攝率

是違欠甚至開慶年間尚欠二萬餘石宜乎嚴之欲請  
于朝欲將代解之絹從本州折價糶米徑令婺自解絹

準省劄行下許令嚴州于代絹解內截留一半計一萬  
八千疋自市令以充軍食仍以一半絹解赴戶部亦令

婺州解絹一萬八千疋補足戶部元額却與免撥米還  
嚴州自景定元年始續婺州乞解絹解米各仍舊貫本  
部又已節次備申續準行不若婺州欲仍舊貫令須預  
辦一年之米一萬五千碩發還嚴州方可從申續又據  
婺州中已橋到米一萬石即還嚴州今嚴州又申每歲  
差撥入舡取米每令坐困乞照近降指揮監婺州解絹  
容本州自措辦軍糧及謂婺州所報見有米一萬石以  
待本州取發者平時率是虛給以脫本州先次解絹本  
部今與酌可行之說為悠久之計嚴州解本部之絹不  
患其不足婺州還嚴州之米深慮其夫信欲催嚴州之  
絹當先催婺州之米州郡一也體統一也豈可謂本部  
可催嚴州之絹而不為嚴州催婺州之米乎况嚴州申  
請不已者止以婺州之米不還米苟還矣其將何辭所  
有景定元年互撥米絹嚴州已將合解一半之絹折價  
糴米以充軍糧訖况隔一載難于再理當令婺州將合  
還嚴州景定元年米一萬八千石每石照農寺司折價



解部買絹補還元額專官前往守待起發所有景定二  
年以後年分其婺州還米一萬五千石嚴州解絹一萬  
八千疋各分作三綱須管婺州先自起發本色米斛至  
嚴州文管同嚴州絹綱中發赴部第一綱十一月下旬  
第二綱十二月下旬第三綱次年正月下旬發米之交  
管嚴絹之起綱定在如期同時到部仍委各州僉判任  
責提督申自今後各部僉判批考及離任須管具本年  
本任內各處發米發絹數日月日申本部點對如無欠  
闕候行下方許批書欲乞劄下嚴婺兩郡遵守併乞劄  
下吏部遵守施行候指揮照得嚴婺州兩易絹米事昨  
降指揮已自平允今戶部以兩郡析中不已區畫悠久  
之說來上理亦可行須議指揮十月二十二日奉聖旨  
依戶部所申事理令各處遵守施行仍婺果守信嚴亦  
令各部正任通判任責催發不許違戾

何不利之有第婺為反覆終不如行兩易之為愈也

景定嚴州續志卷二

欽定四庫全書

景定嚴州續志卷三

宋方仁榮鄭瑄同撰

學校

州學在城西北隅始學門屈折東出乾道五年張宣公知州始闢南向直北為櫺星門又北為泮水為大成殿門殿于一學為中殿廡為從祀為前廊位兩廡有俠廊錢糧庫在其東由殿門而東為肅儀位為魁星樓西為

公厨大成殿之北為明倫堂堂之東為名侯祠

宋廣平  
范文

正 田諫議

張宣公

胡

西為先賢祠

皇甫吏部  
李都官

致堂

趙清獻

潘養空

方元英

嚴先生

喻玉泉

趙

復齋

江諫議

詹光祿

錢融堂

即堂廡為四齋

東曰時習曰近思西曰克己曰篤志明倫堂之北為勅

書樓下為南軒東萊二先生祠東為世美祠以時郡侯

之世守者西為直舍學計病不給每有敝壞必州郡捐

帑葺治初雍熙二年卜今址更田諫議范文正趙清獻

三大賢然後棟宇之制教養之具悉備自雍熙至大觀

一新之大觀至紹興又一新之蓋百五十年間三改作  
矣自紹興至今百二十年補苴支吾僅免頽壓撤故就  
新未易議也今侯錢可則廉知學有槩山一段官家以  
薄租專其利滋久命奪以還學專以地利給修造費美  
意為作繼云諸生立石于學

魁星樓為一學偉觀前知州吳槃既勤樸斲今侯錢可  
則始丹堊其上以奉魁星郡人方逢辰書其扁其下為  
會食之所始名育美眉山楊棟為記今改為登雲

釣臺書院

釣臺距城五十里范文正公始創祠宇紹興四年知州  
顏為嘗加葺治名其閣曰容星軒曰羊裘八年知州董  
弁作招隱堂于祠之左前志列于桐廬縣古跡下淳熙  
五年知州蕭燧重修呂成公為記紹定戊子知州陸子  
適始創書院淳祐辛丑知州王佖始延堂長訓嚴氏子  
孫月計所廩給之又十一月辛亥知州趙汝歷鑿石累  
土以廣其地益以棟宇為門三間榜曰釣臺書院歷級

而升為官廳左仍先生祠也羊裘軒客星閣悉仍其舊以招隱堂廢產為燕居堂下為門廡榜曰燕居之門由官廳而右為講堂榜曰清風堂堂之北為複屋榜曰遂高堂堂之南臨流為閣榜曰雲峰烟水為四齋曰明善在清風堂之南希賢在其右曰尚志在雲峰烟水之左修已在其右為爐亭曰會友山長堂長有位祭器有庫儲畜有倉庖湢有所於是延致衿佩教養其間綸釣之地有弦誦聲矣改登臺路于書院之右山腰有亭以待

憩息東臺舊有亭更為亭西臺對立相望第董事者識  
凡芟夷古木路取逕直無復盤旋之舊識者非之郡捐  
帑五萬緡就城為抵質庫月收其息以助養士明年知  
州季鏞聞于朝以州學教授蕪山長循故實以四仲月  
守致詞遣山長率職事致祭守亦時往書院之制蓋畧  
備矣然枕高懸虛以為基士子巨浸溝湮土頽不十年  
廩廩欲壓景定辛酉令侯錢可則亟修治之視舊益勝  
客星閣舊淪於僧舍頽圯滋甚命僧撤其故為法堂更



卜爽塏於佛廬之左建馮此山草木自是益精神矣書  
院有田今六十四畝有竒以嚴氏孫掌之而山長稽其  
出納養士錢米仍給之州山之陰有平疇山先生故所  
耕也

州學教授題名

學惟教授一員宣靖兵興至乃闕官紹興二年始復置  
乾道五年呂成公以太學博士需次來為員外教授後  
未有繼者淳祐十三年省併京局官為在外添差乃復

負外置以監封樁庫江一鶚為之然非常員前志例無  
題名今補其闕自紹興二年始

石嗣慶

紹興二年八月初三日到任

朱良弼

紹興五年十一月初四日到任

沈係

紹興八年十二月初五日到任

鄭範

紹興十一年十二月初五日到任

繆若虛

紹興十四年十二月初五日到任

王大治

紹興十八年十二月初五日到任

葛騏

紹興二十一年閏四月十三日到任

陳祖言

紹興二十三年十月初六日到任

嚴抗

紹興二十六年五月初三日到任

鄭南

紹興二十八年四月初二十六日到任

徐存

紹興三十一年五月初二日到任

沈必豫

隆興二年六月初三日到任

鄭庶

乾道三年六月初十日到任

呂祖謙

乾道五年九月十五日到任

曹嶧

乾道六年七月  
初三日到任

蔡霖

乾道六年十一月  
十九日到任

程宏圖

乾道六年九月  
初七日到任

袁樞

乾道九年二月  
二十四日到任

顧強

淳熙三年二月  
二十六日到任

祝華

淳熙六年二月  
初三日到任

楊寅

淳熙八年八月  
初二日到任

劉文富

淳熙十年六月  
二十四日到任

蔡冲飛

淳熙十三年八月初一日到任

鄭昉

淳熙十六年十月初二日到任

練文

紹熙三年十二月初三日到任

黃楫

慶元五年十二月十七日到任  
五年二月十三日滿

俞森

慶元五年二月十三日到任

何剡

慶元五年六月二十四日到任  
嘉泰二年八月召除學官

林式之

嘉泰二年八月二十日到任  
開禧二年二月十八日滿

侯允

開禧二年二月十八日到任  
嘉定二年三月二十一日滿

葉洪

嘉定二年三月二十一日到  
任五年三月二十一日滿

徐有孚

嘉定五年三月二十一日  
到任八年四月十七日滿

陳潮

嘉定八年四月  
十八日到任

元伯潛

嘉定十年十一月  
二十六日到任

施琮

嘉定十二年六月二十九日到  
任於十五年八月替滿赴班

陳震

嘉定十五年九月初一日到  
任寶慶二年正月初八日滿

李大同

寶慶二年正月初九日到任  
三年十月初九日到任三年十

卜夢符

慶元三年十二月初七日  
兩易到任

林石

紹興二年四月初五日到任  
五年五月初三日滿替赴班

戚達先

紹興五年五月初四日到任  
紹興五年十二月去赴班

陳鑄

紹興六年八月初六日到任  
端平元年六月初六日兩易行在省倉上界門

葉英

端平元年七月十五日到任  
嘉熙元年十月十四日滿

周琮

嘉熙元年十二月二十五日到任  
淳祐元年三月二十四日滿任

陸獻

淳祐元年三月二十四日到任  
淳祐元年五月二十日去任

桂錫孫

淳祐元年十月初二日到任  
淳祐四年十月十六日滿

章士元

淳祐四年十月十六日到任

王得一

趙良維

淳祐八年四月二十九日到  
任十一年六月十六日滿

沈應丑

淳祐十一年六月到任  
寶祐二年八月內滿替

方畿

寶祐二年八月十三日到  
任四年十月初二日去任

林申

寶祐四年十二月二十七日到任  
開慶元年二月七日滿

江一鶚

寶祐六年特旨添差十一月  
景定元年十一月得旨特差  
初二日到任至  
提領戶部犒賞

所准  
遣

鄭瑤

景定元年正月二十五日到  
任四年二月十三日滿替



陳夢虎

景定四年二月十三日到任  
咸淳二年二月二十六日滿

聞有大

景定三年指揮使增差詩賦教官咸淳改元  
以釋褐被旨特與堂除填見闕是年二月十

六日到任四年七月二十日滿替

翁淳甫

咸淳二年二月二十六日到任  
五年三月二十一日滿替

方用

咸淳四年七月二十日到任

趙希塋

咸淳五年三月二十一日到任  
八年六月初八日滿替

貢舉

貢院在州學之西賓興就試者逾七千人解額僅十八

人淳祐己酉知州趙孟傳增創西廊八間寶祐乙卯知州吳槃採巨木造試桌分置廊廡以革納案雜選之患初端平甲午詔增天下解額視辛卯舉終場人數為差辛卯衢寇猖獗郡與衢隣士以保護鄉井多不暇試終場人數比他舉不逮故增額亦不及之今以書學專門者餘二千五百人而貢者四人艱亦甚矣淳祐丁未舉人黃蛻大對為天下第二庚戌舉人方逢辰大對為天下第一知州趙孟傳吳槃今侯錢可則迭援近比以增

解額為請天高聽遠尚仍其舊云

登科題名

郡山川奇勝士生其間清高相向科第餘事耳趙清獻公知州始刻碑州學紀登科者名後來者續刻之洎淳熙丁未刻石始遍更為第二碑今又將遍矣蓋郡之士風日盛射策君門者比舉益衆碑之屢續也固宜乃若黃銳為丁未第二人方逢辰為庚戌第一人又皆以氣節自貴重無忝大名非但鄉閭之榮也今續題名自寶

慶二年始

寶慶二年王會龍榜

洪夢炎

余肆

葉微

馬登龍

葉端平

趙孟修

趙師緝

趙爍夫

趙汝綰

趙汝得

趙彥岳

紹定二年黃朴榜

方應旗

汪自強

洪牧

胡伯驥

紹定五年徐元杰榜

江時舉

洪揚祖 上舍

姚夢角

李濬

端平二年吳叔告榜

江應發

趙由迪

嘉熙二年周坦榜

邵應豹

林旂 上舍

方若

吳季子

王紘

何應旂

方洪

趙綵夫

淳祐元年徐儼夫榜

邵甲

翁應弼

黃宗仁

洪松欏

淳祐四年留柳炎榜

余夢洪

胡夢魁

舒文龍

國學

淳祐七年張淵微榜

黃蛻 榜眼

葉曇 甲科

趙與楸

洪元忠 國學

方元善 國學

趙傲夫 上舍

翁文龍

翁旂

李鴻翼

淳祐九年方逢辰榜

方逢辰

元名夢魁  
御賜今名

方登 甲科

方吉

馬季麟

吳洪惠

洪蘭

胡夢麟

寶祐元年徐勉榜

黃應棧

國學

葉洪祖

任桂發

洪承祖

方績

寶祐四年文天祥榜

洪文伯

上舍

趙與東

上舍

黃嘉

洪伏龍

盧萬里

上舍

時賽

鄭涇

開慶元年周震炎榜

洪榕

何應斗

翁蒙正



鄭琚

景定三年方山京榜

方炎午 上舍

方槐

吳雄飛 上舍

胡順昌 上舍

余義端 省試  
前名

濮桂發

胡夢高 內舍

方龍榮

周瀛

鄉飲

古者黨庠術序鄉飲有常後乃視為曠典雖名都大藩  
或百載不一舉况於巖乎亦越名侯相望思美教化用

能酌時之宜為之損益以無忘古意焉故特書之

紹興間知州蘇簡行鄉飲禮成有詩示諸生刻于學  
嘉定戊寅知州鄭之悌行鄉飲于貢院會者千餘人  
郡人詹良為賓

淳祐壬寅夏四月癸丑朔知州王佖行鄉飲於貢院  
會者千餘人郡人錢時為賓明日時詣學講書有紀  
事一卷校官桂錫孫為之序

寶祐甲寅知州李鏞修學告成秋七月辛丑朔舍菜

于先聖先師祀畢升堂講書因酌諸生會者百餘人  
景定辛酉今侯錢可則以正月甲午舍采于先聖先  
師祀畢序拜齒飲會者五百有餘人郡人王巖為賓  
推高年者為老飲畢饋賓老以幣有紀事一卷校官

鄭瑄為之序

學所以明人倫也古者黨有庠術有序鄉有學鄉飲之禮歲一行於黨再歲行

於州三年一行於鄉人倫之化無時而不明也世降而下至迺視為曠典今巖為輔邦土儉俗貧縮蒐苒苒者率支補不給蒐墜舉逸尤弗暇蓋自壬寅之後寥寥至今景定初元東萊先生來宣天子德意政教並行人士胥悅游刃之下不見肯綮先立春數日戒學官飭舊典其以改歲之二日釋菜于先聖先師爰命

邦人序拜齒飲庶昭學校明倫之意瑤粟承未幾先生即以成式示居敬行簡井然有條即事之日先生率郡僚延三老質明咸集登降有度獻酬有文尊老有饒仁義之氣藹如也者考在右怡怡愉愉俊秀在列肅肅雍雍顧瞻敬嘆莫敢踰越信哉學之所以明人倫也矧是邦人士風陶宣公成公之化二公有祠與學同久今儲君以歲上元奠謁于膠庠首躋二公於從祀之列而先生又以儲郎之戒相門之英來修二公之化以嘉惠儲君之治道脉國脉相為無窮先生致澤之規模其殆昉於此矣邦人士德先生之意厚甚

鄉會

鄉會所以篤粉榆之誼惟唱第卑鄉之位于朝與仕于

京者張宴湖山為新貴者慶最為盛集嚴為恭聖仁烈  
皇后毓慶之鄉后兄楊惠節王次山字仲甫后姪敏肅  
王谷字聲之忠憲王石字介之每集必為統盟其後節  
鉞蟬聯纓紱輝映率繼先志今節使蕃孫之子鎮以尚  
帝姬益貴斯集益有光焉每集必有題名今撫紹定龍  
飛所題于左

紹定龍飛題名

主集

新安郡王

永寧郡王

與集

王臨應伯

方備士武

鄭穎茂叔

方萬里子萬

王井深父

趙時僕民望

趙時恢洪道

邵克勤宗禹

王異倫叔叙

余輝文炳

詹好德懿子

洪擬祖季擬

方若水善甫

朱淮長源

洪忠汝忠

方應旗正甫 汪自強行之 洪牧尊之

胡伯驥德甫

人物

郡人物表表相望大抵尚氣節而輕功名有子陵一絲之風南渡人物前志尚闕如也今嗣書之

詹至字及夫郡人父安為鄉先生躬教四子皆登進士第公其次也建炎初通判鞏州敵騎將及境郡守假它檄去公合民兵七千人授甲登陴入與家人訣

出約死守敵力攻五日而遁紹興初詔有事于明堂  
公奏與其崇孝饗之虛文曷若厲復讎之大義請移  
費佐軍剋圖恢復事雖不行識者韙之張忠獻公督  
師辟公掌機事以功除直秘閣忠獻去國公不復用  
後為永興等路提點刑獄丐祠歸沒張宣公銘其墓  
詹儀之字體仁至猶子也登紹興二十一年進士第  
乾道間張宣公守鄉郡呂成公分教公方家食日以  
問學為事淳熙二年公知信州時朱文公呂成公俱



在鵝湖往復問辨無虛日及帥廣東首以漁溪舊治  
立祠曲江上張宣公為之記後論廣鹽官鬻之弊孝  
廟避之除公吏部侍郎知靜江府因任六年官鹽弊  
革未幾代者飛語中公有袁州行光皇登極念公故  
官僚許自便既歸而沒公論惜之

胡國瑞字嘉言郡人登崇寧二年進士第以博學稱  
大觀初命修九域志尋為刪修官又除為編修官時  
奔競成風公獨以在館中為樂不覬他官宣和寇起

鄉郡命公為鄉導勦之後仕至吏部侍郎

葉三省本郡人以太學生釋褐後入仕為中書舍人  
紹興二十二年坐詆休兵為非下之理責居筠州

喻樗字子才登建炎二年進士第嘗受業龜山趙忠  
簡公崇尚洛學薦公除正字告詞有曰頃窮西洛之  
淵源遂見古人之大體雖為衆所嫉而忠簡知之益  
信有中庸大學論語解及玉泉語錄行于世寶祐甲  
寅知州季鏞繪肖于學宮祠之

葉義問字審言郡人登建炎二年進士第紹興二十九年為吏部侍郎時相主和議兵備寢弛公奏有備無患請防海道守淮甸遣戍卒嚴斥堠揀軍馬牧此六者今日急務卒行則不及預備則有餘尋除兼尚書三十一年以知樞密院視師江淮遂有采石之捷馬大同字會叔郡人登紹興二十四年進士第自為小官即以剛介聞改秩除國子監簿對便殿上與語輒奏不然明日謂宰執曰夜來馬大同奏對朕與之

辨論凡不然朕說者三氣節可喜由是簡知孝廟有大用意後每對上輒陳恢復大計歷中外要官必求盡職以洗寃澤物為已任所至雖遐僻童孺無不知公名仕至戶部侍郎

趙彥肅字子欽郡人號復齋先生天資孝友留意聖賢之學窮理盡性弗深造自得弗措也登乾道二年進士第會高皇遺劔輟三年不仕宰臣周必大薦之孝廟甚力先生益以近名為謙仕至寧海軍節度推


官有易說及廣學雜辨士冠士昏饋食圖行於世朱  
文公觀其書嘆曰近世未有如此看文字者嘉定己  
卯知州鄭之悌即祥符寺遺址建堂祠之命學官春  
秋詣祀寶祐甲寅知州季鏞復繪肖于學宮之先賢  
祠

鄭穎字茂叔郡人游太學有聲登嘉定十年進士第  
宦轍所至輒以最聞守嘉禾以理御召言者沮之且  
逮吏稽在任出納摘其疵無所得私嘆服之後其子

璿為大理評事會時相以意嫉邊守下之理必死之  
公謂璿曰殺人以苟容如天理何璿奉法如公教竟  
以忤歸公笑曰是足為吾子矣公自嘉禾歸十五年  
竟不復仕

錢時字子是郡人號融堂少力學自貴重後著書立  
言以鄉先生稱嘗以易領漕舉試南宮輒不利絕意  
仕進嘉熙二年宰臣喬行簡奏上補迪功郎秘閣校  
勘兩人史館終不斷顯仕有周易釋傳尚書演義學

詩管見春秋大旨四書管見兩漢筆記國史宏綱蜀  
卓前後續橐冠昏記等書行于世寶祐甲寅知州季  
鏞繪肖于學宮之先賢祠



景定嚴州續志卷三